

61386/P

[P]

D'URBAN



Digitized by the Internet Archive
in 2018

<https://archive.org/details/b30386718>

[P.]

DISSERTATIO MEDICA
INAUGURALIS,
DE
HAEMORRHAGIA UTERINA:

QUAM
ANNUENTE SUMMO NUMINE,
EX AUCTORITATE
Amplissimi SENATUS ACADEMICI,
et nobilissimae FACULTATIS MEDICAE *decreto;*
PRO GRADU DOCTORATUS,
SUMMISQUE IN MEDICINA HONORIBUS ET PRIVILEGIIS
RITE ET LEGITIME CONSEQUENDIS,
ERUDITORUM EXAMINI SUBJICIT

JOANNES D'URBAN, BRITANNUS.

A. D. VI. Idus Junias, hora locoque solitis.

EDINBURGI:
Apud HAMILTON, BALFOUR, et NEILL:
M,DCC,LIII.

216704



GULIELMO SMELLIE,

MEDICINAE DOCTORI,
QUI PENITISSIMA ARTIS PERITIA
MANIBUSQUE FACUNDISSIMIS
OBSTETRICIUM
EXERCET, AMPLIFICAT, EDOCET,
CUM ALUMNORUM FRUCTU,
MISERARUM SOLATIO:

NEC NON,

BENJAMINO GOOCH,

VIRO AMICISSIMO,
CHIRURGIAE ET MEDICINAE PRUDENTIAM
FIDE, CONSTANTIA, HUMANITATE
ORNANTI;
ARTE, PLURIMORUM SALUTIS;
VITA, MORIBUS, INDUSTRIA,
SUORUM FELICITATIS
AUCTORI;
CONTUBERNII, DISCIPLINAE, EXEMPLI MEMOR,
TENTAMEN HOCCE MEDICUM,
OBSERVANTIAE ET AMORIS
MONUMENTUM,
DICATUM VOLUI

JOANNES D'URBAN.

DISSERTATIO MEDICA

INAUGURALIS,

DE

HAEMORRHAGIA UTERINA.

INTER plurima et diversissima morborum quibus feminae obnoxiae sunt, genera, haemorrhagia uterina, quippe quae perniciem subitam persaepe minatur, maximè periculosa est; morbi enim plerique alii, remediis saltem adhibendis tempus et spatium permittunt, atrox verò et immane hocce sanguinis ex utero profluvium, subito adeo et citò saepius enecat, ut nobilissima quaeque remedia frustra et incassum adhibeantur. Omnis autem sanguinis ex utero fluxus minimè morbis accensendus est; feminis enim Natura, menstruum sanguinis effluxum, sanitatis praefidium providè admodum molita est: qui tamen fluxus menstruus, temporibus suis erumpens,

A

copia

copiâ tanta et violentia interdum profluit, ut, nisi arte cohibeatur, vel saltem imminuatur, eo usque ruat, ut malis consequentibus, multorum postea morborum feminibus, femineam illam, generis humani conservatricem, compagem diruat.

Haec itaque est primae uterinae haemorrhagiae species, quam hic loci, quantum poterò dilucide, tractare conabor : secunda vero ea est, quae praegnantibus accidit : tertia illud est profluvium sanguinis immodicum, quod post partum saepe evenit, et mulierem jam feliciter enixam e medio tollit.

Non a proposito alienum videtur, si antequam opus adgrediamur, pauca de fluxu menstruo proferamus : ut verò fluxûs hujus cognitio, ex uteri structurae cognitione magna ex parte pendet, primum de hac structura differendum.

Uteri compages in mulieribus non gravidis, adeo obscura et investigatu difficilis est, ut pene impossibile sit aliquid certi de ea statuere. Externa ejus superficies membranâ, valida
lida

lida a peritoneo orta investitur, interna verò tenui membrana, quae in parte superiore laevis utique et mollis est, circa cervicem rugosa et in fulcos efformata. Pars interior ejus substantiae spongiosam quandam cellulosam aut cavernosam speciem praebet, instar ferè lienis, aut corporis penis cavernosi: externa vero duriore, firmiore, magisque musculari compage donatur. Fibrae porro quamplurimae musculares, totam ejus corpus pererrare conspiciuntur. Vasa ab hypogastricis et spermaticis orta, in infinitos ramos divariantia, et secum communicantia, mirum in modum contorta et plicata, per totum uteri corpus excurrunt. Liquor per vasa unius lateris actus, facile in vasa alterius transit. Arteriarum fines quamplurimi in uteri cavum hiant, et liquor per vasa hypogastrica adactus, per eorum ora in uteri cavitatem effunditur. Sanguis praeterea, in mulieribus, manante fluore menstruo extinctis, utero leviter pressio, per haec orificia stillare cernitur. Lympha tenuis, ad uteri cavitatem lubricandam, dum non menstruans est mulier, per has vias transit.

In

In mulieribus non gravidis, omnia haec vasa uterina valde exigua sunt; post impregnationem verò, sensim dilatantur vasa, praecipuè venosa; in magnam molem creëcit uterus, et ejus cellulae in conspectum prodeunt, earumque ora ita augentur, ut calamus scriptorius, imo aliquando digitus minor intromitti queat. In utero gravido hae cellulae innumerae ferè conspiciuntur, et in parte uteri interiore, molli et spongiosa, ubique communicantur: arteriarum ramuli super eas repunt, et vulgò creditur, sanguinem ex ipsis arteriis in earum cavitatem effundi; an ita sit necne, solis experimentis arte anatomica factis confirmari potest.

Nuper autem, quum mulieris sex menses gravidae dissectioni adesset, haec inspectanti obversabantur. Liquor cereus, coloratus, per arterias injectus, in has cellulas tenuitantum filo pertingebat: affatim verò per arteriarum patula orificia in uteri cavitatem exibat: in placentae quoque superficiem arietans, vi sua sese insinuans, ab utero eam distinxit. Per venas verò uterinas liquor actus quam facillimè cellulas implebat. Cellularum
cavitates

cavitates summa diligentia perlustratae, et cerâ inde avulsa, venae quamplurimae, liquore per venas uterinas injecto, repletae, in earum cavitates hiare conspiciebantur; arteriae verò paucae et exiguae.

Hinc verisimile est, cellulas hasce venarum tantum esse appendices, et humorum receptacula ab arteriis foetûs redeuntium, qui illuc primum appellant, et illic sanguini matris venoso immiscentur: nec absimile est, sanguinem matris arteriosum effundi ab arteriis in cellularum cavitatem hiantibus, et illic succis a foetu redeuntibus immisceri, ob eandem ferè rationem, quâ sanguis arteriae umbilicalis cum sanguine venoso communicatur; ut nimirum acceleretur motus humorum a vasis foetûs redeuntium: sanguinem praeterea menstruum, ex arteriarum finibus, in uteri cavitatem hiantibus, provenire; et has cellulas, extra graviditatis tempus, ferè evanescere, vixque ullum praebere usum, nisi cum foetus est in utero.

Uterus ope muscularis suae structurae ita comparatus est, ut, quanquam graviditatis tempore, in magnam molem distendatur;
excusso

excusso tamen onere, in statum pristinum citò redeat.

Quomodo verò, et ex quibus causis, illa vasa uteri excretoria, quae in statu suo naturali tenuem tantum lympham emittunt, constante naturae lege, certis temporibus adeo dilatentur, ut sanguinis partem craffiozem, rubrum scil. tam copiose transmittant, inter Physiologicos quam maximè disconvenit.

Quorum opiniones varias enumerare, et argumentorum vim plenius perpendere, hujus opusculi non est. Quare, neglecta (a) ARISTOTELIS sententiâ, qui fluxum illum, ex periodo ejus menstrua, lunae temerè adscribit; tres solum theorias diversas breviter perstringamus, quarum aliquam celeberrimi quique medici amplexi sunt.

Plethoræ hypothesin (b) GALENUS suscepit, et contra ERASISTRATUM defendit, quam

(a) ARISTOT. Ζώων ἰστορίας τὸ Η. Περὶ κατὰ μνηνίων
τῶν γυναικῶν. Κεφαλ. β.

(b) Περὶ φλεβοτομίας πρὸς Ἐρασίστρατον βιβλίον.
Κεφαλ. ε.

quam post eum, ex recentioribus maximè insignes comprobarunt. Qui hanc doctrinam complectuntur, feminas, suapte naturâ, hujusmodi redundantiae obnoxias esse, probare conantur; eamque opinionem, hisce argumentis firmant. Molliorem nempe, humidior, et laxiorem corporis femininae texturam apud omnes constare; et inde, secundum SANCTORIUM, corpora maximè humida minimum perspirare, atque hinc proficisci aphorismum illum: (c) *Aquae potatio perspirationem insensilem impedit.*— Perspirationem (scil. SANCTORIANAM) ut caeteras secretiones, pro ratione cordis impetûs, et orificiorum canalium fecernentium, majorem aut minorem esse.— In feminis autem, vim vitae, quam in viris, multo imbecillior, vasorumque capillarium orificia minora, et proinde perspirationem minorem, unde majorem etiam humorum redundantiam superesse.— Feminæ vitæ genus, sedentarium scil. et minus exercitatum, hujusce superflui humoris cumuli in causa esse: unde ingesta excretorum rationem excedere, plenitudinem-
que

(c) SANCTOR. sect. 3. aph. lxvii.

que insequi.— Compertum esse, (*d*) foeminae, caeteris paribus, plus sanguinis quam marem continere; atque exinde, feminas imbecilliores, dato tempore, majus sanguinis impendium robustissimis viris pati; ut persaepe in haemorrhagiis uterinis videre est.

Itaque, plethorâ periodica stabilita, quare haec redundantia per vasa uterina potius quam alia excernatur, monstrare pergunt: quorum praecipua sequuntur argumenta.

I. Quod aorta descendens infra emulgentes in feminis latior est; arteriae quae pelvim introeunt, capaciores, si non plures, quam in maribus; hypogastricae in uterum praecipuè impensae, multo quam in ulla alia corporis parte, ejusdem magnitudinis, ampliores: contrà, venae uterinae pro portione minus latae, quam in viris, eademque quam alibi in corpore humano firmiores sunt; praeterea valvulis carent, quibus sanguis rediens, qui in directum ferè surgit, in ascensu suo adjuvetur, cum simul sanguis per arterias influens, eodem ferè modo descendat.

II. Quod

(*d*) HALE'S *Haemastatics*.

II. Quod uterus texturae est laxae et fungosae ; viscus in corpore feminino maximè vasculare ; in infima praeterea corporis parte situm ; et ab omni musculorum pressura prorsus immune, in pelvi femineae (*e*) ampliore : unde, ex notis fluidorum legibus, uterum plus sanguinis accipere, magisque visceris, ulla alia corporis feminini parte, distendi necesse est.

Ex hac in feminis proclivitate, ad majorem humorum copiam generandam quam quae ad corporis nutritionem sufficiat, quotidiana superflui sanguinis accumulatio necessario sequetur, eaque, uti supputant, circa drachmas quinque, singulis diebus : ita post triginta dies eò ingravescet plethora, ut emissaria uterina dilatet et in uteri cavitatem aditum sibi faciat. Cum autem plethora menstrui fluxus causa efficiens statuatur, plethorae ipsius causa finalis haecce videtur : ut scilicet mater gravida sine humorum impendio, qui ad proprii corporis nutritionem necessarii sunt, alimentum etiam foetui praebere possit : ne

B

autem

(*e*) Osteol. App. MCNRO.

autem feminae vasa, redundantia illa sanguinis copiâ opprimantur, ubi nullus in utero foetus est, qui exhauriat; natura aliam viam, uterina nempe emissaria, patefecit, quae menstruam hancce redundantiam effunderent.

Multae et magnae hanc theoriam difficultates comitantur: corporis humores adeo variant, ex inconstante eorum statu, et tam variis causis augeri aut minui possunt, ut accumulationem tam aequabilem fieri vix credibile sit: ut scil. quamvis multae aliae fiant evacuationes, multa sit exercitatio, et exilis illis diaeta, sanguinis tamen incrementum, sensim adeo vasa impleret, et certis periodis, viam sibi per vascula aperiret, quae aliis temporibus eum transmittere nequeunt.—Si ingestorum et excretorum differentia sit, pro ratione drachmarum quinque per diem; quatuordecim diebus, post proximam periodum menstrua, novem fere unciae sanguinis erit accumulatio: tot unciae sanguis a vena aliqua mittatur, et periodus menstrua, tot dies post tempus solitum protrahi videretur: nil tamen tale fit.—Per mensium intervallum, femina saepius plethorica est, hoc tamen eruptionem non accelerat;

celerat; et evacuationes ad sanguinis onus sublevandum adhibentur, qui tamen per hanc theoriam, per vasa uterina emitti debebat.— Si plethora mensium causa sola atque immediata esset; sanguinis tanti, aut saltem bis tanti missio, quantum in mensibus vulgo effunditur, eos praeccluderet, aut malis ex eorum obstructionibus sequentibus subveniret: quorum tamen neutrum in praxi percipitur.—Praeterea, ex (f) staticis experimentis apparet, corpus femininum interdum duas libras plus pondere eodem intervallo, uno tempore quam alio, eodem manente habitu corporis; cum tamen nulla inde molestia aut menstruorum eruptio fiat. Hae, ex multis, paucae sunt objectiones, quae contra hanc theoriam adducuntur.

Fermentationis hypothesis, five utero propriae, five per totum corpus diffusae, ex effervescencia, seu stimulo acri, tot validis objectionibus est obnoxia, ut in universum fere rejiciatur: cujus (g) auctores mensium causam finalem hanc assignant; ut sciz. omnes fordes recrementitiae

(f) Dr. KEIL.

(g) De GRAAF. BAYL. ETMUL. CHARLTON. &c.

recrementitiae ab utero depurgentur, et ut sanguinis massa ab omni faece pura reddatur. Hanc ut firmarent, multa de prava et deletoria menstruorum natura propagarunt; quum re vera, non sit alius in corpore humano sanguis purior.

Tertia denique restet consideranda hypothesis, in qua (*b*) auctor ingeniosus, haemorrhagiae causam in ipsius uteri, quod gradatim fit, incremento ponit;—periodicum sanguinis fluxum necessariò ex ejus structura sequi existimat;—finalem omnem causam excludit, quasi uterus propriam suam conformationem, ad generandum tantum, non ut menstrui sanguinis evacuationi inserviret, accepisset; fluxumque fortuitum et (contra summi philosophi (*i*) effatum) per se ad nullam rem utilem autumat.

Haec theoria, prima facie multum arripet, atque facilem menstrui fluxus rationem tradit; symptomatum etiam eruptionis tem-
pore

(*b*) THOM. SIMSONIUS Chand. Proff. med. et anat. St. Andr.

(*i*) In partibus corporis, nihil inane, nihil sine causa, nihil supervacaneum est. CICERO de Nat. Deorum.

pore occurrentium, et obstructionem sequentium, sine difficultatibus quibus plethorae hypothesis obnoxia est: Ubi autem accuratius subit examen, ut in plerisque argumentis, ubi Data deficiunt, multa objicienda oriuntur. In hoc enim argumento, nihil posito, quod proclivem arteriosi sanguinis per venas hypogastricas reditum impediat, vix credi potest, quânam is per minutissimâ lateralium vasculorum, quae uteri cavitatem ingrediuntur, transitum sibi faciat, cum multo facilior alibi sit exitus. Praeterea, periodicas evacuationes, menstruis subsidiarias, a diversis corporis partibus apud auctores, et in praxi passim comperimus: a naribus, scil. pulmonibus, oculis, imo extremis digitis, ubi nulla singularis ejusmodi structura assignari potest. Nec video quid impediat, quo minus periodica sanguinis fiat evacuato, a quavis corporis cavitate, propter eandem rationem quam fluxui menstruo adscribit; siquidem omnes cavitates vasa lateralia seu exhalantia habeant, in se humores injicientia; quae, similibus de causis (modo tales re vera sint) ita dilatari possunt, ut certis periodis, sanguinem rubrum transmittant.

Porro

Porro, hic auctor, sanguinis a diversis partibus eruptionis, quae menses obstructos sequitur, et quae eandem cum mensibus periodum observat, hanc causam statuit: *impetum* nempe in totum corpus factum, eodem tempore, quo menses frustra eniti conuntur. Oportet autem ut vis, quae hunc in totum corpus *impetum* efficit, sola sanguinis sit copia, differentiae inter sanguinem, quem hypogastricae et arteriae spermaticae infundere solent, et sanguinem, quem nunc in obstructione mensium infundunt, aequalis. Nec quidem eam tantum *impetum* efficere credibile est. Quantuscunque autem sit, arteriarum epigastricarum et mammariarum communicationem tanti facit auctor, ut quis putet haemorrhagiam a mammis semper provenire: aut saltem, sanguinem retroactum in aliquam partem, cui internae iliacaе, aut etiam externae inserviunt, sese immissurum, atque inde erupturum. Contra autem, evacuatio haecce vicaria saepius ab aortae ascendentis ramulis efficitur. Hic igitur *impetus* necessario universalis erit, et omnia corporis vasa attingens; quae vix, ut videtur, eam sanguinis copiam continere possunt,

possunt, qui per vasa uterina transire solebat, nisi plethora universalis inducatur, et omnia vasa superintumescant, donec imbecilliorum anastomosi, redundantia evacuetur, et plethora definat. Ligetur autem vas equale, aut hypogastrico majus, nihil tale sequetur; caetera vasa sanguinem, qui per ligatum transiebat, facillime continebunt, nec ulla symptomata plethorica sequentur. Ipsa eadem adversus plethoram, ut menstruorum causam, adhibita argumenta, plenam vim suam contra hanc theoriam exerunt. Profluvii igitur uterini causae ab illo adductae non sufficiunt, cum appareat evacuationes vicarias dari, ubi causae similes ne vel existere finguntur.

Inter varias hasce hypotheses, ad hoc phaenomenon periodicum explanandum, excogitatas, plethorae ratio, quamvis nonnullis objectionibus obnoxia, nobis (omnibus rite perpenfis) maxime consentanea videtur. Causa finalis, huic in feminis redundantiae adscripta, quam maxime verisimilis est, et verè existere videtur: eaque semel concessâ, plethora causa efficiens et adaequata, necesse est ut agnoscatur.

In

In feminis menstrua circa annum decimum quartum incipere, circa annum autem quadagesimum nonum, desinere solent; quamvis in temperamentis biliosis, citius, in phlegmaticis autem, aliquando tum in inceptu, tum in defectu, ferius: eademque differentia in regionibus calidis et frigidis observanda est.

Fluxus menstruus, varié, vel ab utero, vel a vagina, vel ab utroque profluere creditur: nobis autem, a solo utero ut plurimum provenire videtur. Quoniam, inde lochia fluere comperimus;—inde etiam, nutrimentum suum a matre foetum recipere;—et si vasa hypogastrica injectione impleantur, in uterum se aperire;—uterum multo pluribus quam vaginam vasis impleri;—tempore graviditatis, quando ovum utero adhaerescit, fluxum menstruum raro cerni;—in casu vero uteri prolapsi, ubi menses conspiciuntur prorsus ab ore uteri interno provenire, res clare demonstrari videtur. In casibus tamen (k) rarissimis quidem, ubi menstrua,
in

(k) HORST. obs. xli. lib. 5.

in graviditate etiam, solitas periodos observarunt, sine magna aut matris aut ovi incommodo, omnino ea, a sola uteri vagina fluere statuendum est. Ubi naturalia uteri emissaria obstructa sunt, a multis aliis corporis partibus, vertice (*k*), scil. vel (*l*) digitis fluere, interdum obvenit; quoniam eadem vasa quae utero, vaginae etiam inserviunt, et ubi alter obstruitur, sanguinem menstruum ab altera evacuari, consentaneum est.

Hoc fluxu appropinquante, praesertim si tum primum virgini accidit, haec fere symptomata cernuntur: in partibus vicinis, praecipuè circa lumbos et coccygem, calor et dolor, cephalalgia, inappetentia, lassitudo, acuti mammarum dolores, et post eruptionem, languor et nausea.

Periodi variae sunt et inaequabiles, nunc trium hebdomadarum, nunc duarum, quamvis plerumque vix mensis lunaris intervallo:

C

et

(*k*) KERCHING. obs. lxxxv. —

(*l*) lxxxvi.

et fluxus in sanis a tribus ad sex, licet in plerisque per tres tantum dies continuatur.

Copia etiam, secundum aetatem, temperamentum, clima, et vivendi modum, major aut minor est. Fluxus autem immodicus dicitur, ubi aut nimium sanguinis una periodo evacuatur, aut ubi fluxus saepius redit. Et hic, cautè, quid nimium sit, statuendum est. In quibusdam enim feminis, naturâ, multo major est quam in aliis, ejusque diminutionem in illis gravia incommoda sequerentur: profluviumque interdum solito majus, ex menstruis aliquamdiu suppressis, accidere potest, cum tamen corpus solitam sanitatem retineat.

Quare attentius consideranda sunt symptomata supervenientia, atque inde de diagnosi statuendum; quae fallax, admodum fuerit, si ex sola copia dijudicetur. Itaque, e. g. si pallor, languor, debilitas, anhelatio, anxietas, partium extremarum refrigeratio, deliquium, suffocatio, convulsio, menstrua comitentur; inde satis constabit, haemorrhagiam immodicam esse, et pro ratione symptomatum, aut leniendam aut coërcendam esse.

Hujus

Hujus profluvii immodici causae praedisponentes vulgo ponuntur, vasorum nimia laxitas, et exin tenuis, soluta et aquosa sanguinis diathesis, praesertim si adsit acrimonia.

Ubi laxa tantum est solidorum textura, per anastomosin sanguis effluit, et laxitas haecce vel dilatatio aut naturalis est, aut inducta: inducitur autem nimia aquosi et calidi liquoris potatione; balneis calidis; vitâ sedentaria; et maxime lecto indulgendo, quod corpus assiduo bulneo vaporis quasi subjicit, omnium relaxantium maximo.

Si autem sanguinis etiam crasis destruat, aut mutua partium cohaesio laxetur, immodica ejus copia per laxa uteri vasa facile profluat, quae jam resistere nequeunt: et simul motus fluidorum, modo aliquam habeant acrimoniam, stimulo quem vasis addunt, necessario accelerabitur; unde major etiam haemorrhagia efficietur. Et multis exemplis constat, haemorrhagias a diversis corporis partibus accidere, ex tam acri et soluto sanguinis statu; ut in scorbut, &c.

Praeter

Praeter jam dictas, multae existere possunt, causae adventitiae, quae, aut per se, aut prioribus conjunctae, hoc malum efficiunt: quales, plethora—coitus immodicus — diuturni et difficiles in partu labores — exercitatio omnis violenta — animi pathemata — aër calidus — medicamenta stimulantia et attenuantia — quicquid denique sanguinis momentum auget et sustinet.

Haec haemorrhagia saepius oritur a placentaefructulis, post puerperium in utero relictis, quae longo etiam post tempore, redeuntibus menstruis, sanguinis fluxum immodicum excitant. Cujus exempla passim apud autores inveniuntur; qua de re postea in suo loco latius tractandum.

Hic fluxus immodicus uterinus, rarissime quidem in (*m*) puellis ante menstruorum aetatem, interdum in virginibus tempestivis, saepe in matribus, praecipue in proVectioribus; nec in aliis periculosior quam in (*n*) vetulis,

(*m*) LA MOTTE traité des accouchemens. obs. cxcvii.
KERCKRING. obs. lxxxvii.

(*n*) HOFFMAN. tom. iv. cas. cx.—cxi.

vetulis, menses jamjam deposituris, invenitur.

Profluvium subitum, quod cum impetu et effusè ingruit (secundum HIPPOCRATEM λαβρῶς καὶ δαψιλῶς) brevi tantum durans, aegrae saepius vitam tentat: si autem mortem effugerit, concretiones tamen polyposae in vasis circa cor consequi solent, quae anhelationes miserrimas per totam vitam creent.

Nec prognosis haemorrhagiae uterinae lentae, quae mensium stillicidium (σαλαγμός) dici potest, minus periculosa est: ea enim, sine medicae artis auxilio, certis, quamvis lentis gradibus, aegram, per malorum seriem, ad mortem tandem deducit: qualia sunt, debilitas,— pallor,— pedum et crurum oedemata,— tremores, fluor albus, eumque semper comitans symptomatum hystericorum cetera,—variae ventriculi, intestinorumque aegritudines,—organorum chylopoëticorum, et haematapoëticorum in muneribus suis impeditio: donec tandem tota fabrica sanguinis depauperati effectus sentiat, et anasarca, ascites,

tes, febris hectica, atrophia, et mors denique hujus morbi agmen cogat.

Ad curationem autem : — impetuosa haemorrhagia coërcenda, — nervosi systematis orgasmus leniendus, — vasorum uterinorum, et solidorum omnium, tonus restituendus, — et debita sanguinis crasis procuranda est.

Ubi fluxus adeo immodicus est, ut pulsum exilem et debilem, sudores frigidos, deliquia, &c. inducat, expeditissima simul et efficacissima remedia interna et externa ad eum coërcendum adhibenda sunt. Aegra resupinanda ; — ab uterinis vasis, misso è brachio sanguine pro aegrae viribus, revulsio est (o) facienda, quod etiam sanguinis momentum minuit ; — mens in tranquillo servanda ; — corpus leniter refrigerandum ; — epithemata ex decocto corticis granatorum, quercini, radicis tormentillae, foliorum rosarum rubrarum, *balausti-*

(o) Et certe quam praestans sit in venaesectione praesidium adversus hunc morbum, conceptis verbis testatur HOLLERIUS in comment. ad aphor. 50. HIPPOCR. § v. *Vidimus, inquit, quae sanguine multo è vena detracto convaluerunt, quum nullis aliis remediis fluxus sanguinis reprimi posset.*

HOFFM. T. ii. p. 225.

balauftiorum, in aqua ferraria, post coctionem addita aceti quarta parte, subfrigida, inferioribus abdominis partibus, et pudendi labiis applicanda, et ex occasione repetenda.

Aliud est etiam contra fluxum hunc vehementem remedium, eo magis memorandum, quod citò operetur, et a quavis vel egena parari possit: si nempe, aliquid admodum frigidum lumbis applicetur: sudorium e. g. amplum, plicatum, oxycrato, vel aquâ marina, vel frigidissima aqua fontana madefactum; quod subito applicandum, et bis aut ter, prout tepescit, mutandum: nec minus efficax erit, si subitò, et aegrâ ignara, applicatum sit; siquidem subitum terrorem saepe menstrua cohibere constat. Notissimum quoque est, si pars aliqua vehementer irritetur, spasma per totum corpus communicari; ea est per totam fabricam filamentorum nervosorum connexio. Si enim pars aliqua sensibilis gelidissimo aliquo corpore subito percellatur, tremorem totum corpus percurrere sentimus; qui progressionem contractionis instantaneam ostendit: et fibrae animales quantumvis laxae appareant, tantam habent tensionem,

tensionem, ut vibrari possint; nec tantum contactu, sed etiam aliorum corporum vibratione, per sympathiam quasi harmoniacam. Quare haud incongruum est, frigidum aliquid lumbis, parti admodum sensibili, applicatum, effectus suos statim ad uterum transmittere, ejusque fibras, et emissariorum orificia contrahere: atque subiti frigoris vis in narium haemorrhagia omnibus nota est; et feralis mensium in fluxu naturali obstructio a frigore, cujus multa infelicia sunt exempla, hujusce rei veritatem penitus demonstrat. Adstringentia etiam externa renum haemorrhagiis multum profuisse comperta sunt.

In casibus admodum periculosis, injectiones adstringentes in uterum (*p*) mittendae saepe utiliter praescriptae sunt; et in hoc laxo oris interni statu, facillime in cavitatem uteri pervenire, et ex immediato contactu, plus quam applicationes externae proficere possunt.

(*p*) Ego olim acacia Arabica ex vino dissoluta cathetere in sinum muliebrem injecta sanavi Guadagniam, olim uxorem meam dilectissimam, a profluvio uteri quo laborabat.

PROSP. ALPIN. de med. meth. lib. xii. p. 726:

possunt. (a) Pessaria quoque, astringentibus armata, interdum cum efficacia salutarī adhiberi inveniuntur.

Brachiorum (b) in aquam tepidam, vino mistam, per horae dimidium immersio, quo sanguis ad exteriora alliciatur, multo quam ad mammas cucurbitae applicatio, ab (c) HIPPOCRATE laudata, potior HOFFMANNO videtur. Sed hac in re metuendum est, ne vinum ita absorptum continuò sanguinem ingrediatur, et stimulo acriore circuitum magis acceleret, quam ore haustum, ubi vinum salivâ, succis gastricis, &c. diluitur et lenitur. Ligaturae etiam, a veteribus in corporis extremitatibus usurpatae, ad cursum sanguinis per venas in cor retardandum, proderunt.

Dum haec remedia parantur, aut adhibentur, aegrae vires et spiritus idoneis cardiacis reficiendae, iis scil. quibus vasa quae exhauriuntur, interim repleantur, nec tamen nimis stimulentur: qualia sunt, jura carniū, aqua vino rubro, limonum, herbarumque
D refrigerantium

(a) PROSP. ALPIN. de med. meth. lib. xii. p. 726.

(b) HOFFM. Tom. ii, p. 227.

(c) Τμημα è. aph. 50.

refrigerantium succo mista, et syrupo cydoniorum edulcata; ex vino rubro et lacte ferum; analeptica omnia; tinctura antiphthifica ad guttas octoginta, in aquae purae cyatho, repetenda pro re nata; tinctura rosarum rubrarum subacidulata spiritu vitrioli ad potum ordinarium: pulvis stypticus, quem cum antihysterics in pillulis admissum, efficacissimum saepius expertus sum.

Frigida aqua, praesertim pluvialis, aut nitro, aut spiritu vitrioli, aut syrupo papaveris rheados mista, a claro (d) HOFFMANNO laudatur: *simplex enim, ait, haec medicina, et diluendo spissos humores, et acres contemperando, nimiumque aestum restringendo, fibras quoque relaxatas firmando, plus certe praestat quam, tantopere a medicis, alia varii generis ad hoc malum domandum laudata specifica.*

Si adhuc a nervosarum fibrarum orgasmo haemorrhagia perdurat, anodyna fere omnia, inter quae opiata, et praecipue laudanum liquidum cum spiritu vitrioli acido, aequali portione

(d) Tom. 2. p. 226.

portione, commistum, tam in hac quam in aliis haemorrhagiis utilissimum observavimus.

Debita etiam non-naturalium ratio, ad recidivam praeveniendam, in omnibus habenda est.

Ubi plethora haemorrhagiae causa esse intelligitur, sanguinis fluxus aliquandiu procedere permittatur, utpote ad plenitudinem amovendam necessarius: a magna tamen quam passa sunt vasa distentione, si forte tonum amiserint, adeo ut sanguinem post plenitudinem amotam effundere perstent; methodus supradicta, aegrae sanitatis restituendae spem facit: et curationis ratio, ubi haemorrhagia ab aliqua aliarum causarum adventitiarum seu procatacticarum oritur, nota semel causâ, illico patet.

Ubi vere solidorum tanta fit atonia, ut sanguinis crasis perierit, et fluxus in habitudinem abierit, tum ad curationem aliquantum ab hac diversam confugiendum. Fibrae in universum

sum corroborandae, iuxta sanguinis crasis re-
stituenda; quae rationes, quamvis diuturnae,
solae tamen sunt, quae haemorrhagiae reditum
praeveniant. Medicamenta adhibenda stoma-
chica, incrassantia, roborantia, cortex, scil.
Peruvianus, vinum rubrum, balnea frigida,
exercitatio modica, &c. si nihil contra indicat;
diaeta subastringens, et pro ventriculi virium,
et exercitationis modo: cibus ficcus, oryza,
fagoe, et analeptica omnia; adhibito subinde
rhabarbaro ad alvum laxandam.

Quamvis autem corroborantia, prima fron-
te, sola huic morbo remedia videantur, expe-
rientiâ tamen constat, haec sola, ex voto non
succedere. Imò fortia adstringentia et nar-
cotica in hoc fluxu copiosius adhibita, a peritif-
simis in praxi medicis, incommoda comperta
sunt; et saepe aegrae molestias augere; con-
tra, parcius adhibita, comitantibus subinde
purgantibus, multo commodiora. Et com-
modae hujus catharticorum efficaciae argu-
mentum videtur:—eorum usu, non tantum
corpus refrigerari, sanguinisque impetum di-
minui, et fibrarum orgasmum amoveri, sed
omnibus glandularum intestinalium excreto-
riis,

riis, una cum vasis exhalantibus, purgativi actione apertis, facilem hâc fluida portam invenire, et effusè ab utero divertì: cujus contrarium obstinatus et continuatus adstringentium usus efficit; cum in omnibus haemorrhagiis laxam alvum utilem esse comperiamus.

Illa deinceps tractanda sequitur haemorrhagia, quae dum ovum in utero continetur, accidit; quaeque longe omnium periculosissima jure censetur: ex illa enim et foetus et matris vita in discrimen fere semper conjicitur.

Haemorrhagiae hujusce ut ideam nostram dilucide planèque exponamus, uteri post conceptum mutationes, et quemadmodum utero ovum agglutinetur augeaturque, quaedam praefari necesse videtur.

Veterum (*e*) hypotheses variae de generatione ferme rejiciuntur, ex quo ova in ovaris

(*e*) Inter omnes convenit, semen virile foecunditatis causam praecipuam, sed de impregnationis modo, et semine feminino veteres inter se dissentiunt.

HIPPOCRATES [ΠΕΡΙ ΓΟΝΗΣ], et plerique post eum physiologici, semen femineum vel humorem a vaginae

is femininis, et animalcula in femine masculino a recentioribus investigata sunt. Recentiores autem, haud magis inter se congruunt de conceptionis modo. Num scilicet, embryo femine in masculino praextiterit?—An ovum aurâ prolifica aliqua sit impregnatum?—Num in ovario?—An tuba Fallopiana?—An, denique, in utero ipso foecundum evadat ovum? adhuc sub judice lis est. Sed omiſſis his, ut opusculo

vaginae lacunis in coitu effuſum, in generando cum femine virili aequè pollere ſtatuunt; et in utroque conjuncto vim plasticam fingunt, quae maffae compositae partes diſponeret et conformaret, dum ipſa utero adhaereſcens, a ſanguine materno ad nutrimentum et incrementum aſſiduam copiam reciperet.

ARISTOTELES contrà, cum ſuis, ſemen virile embryonis maffam componere negant; partes autem ejus ſubtiliores et agiliores, ſanguini menſtruo (ὕλη) vim animantem [δύναμιν κινήſιν, vel θερμότητῃ ψυχίῃ] impertire; et inde embryonem formari: nullum autem ſemen femineum, niſi humorem excrementitium, eſſe contendunt.

GALENUS autem in tractatu, Περὶ Σπέρματος, opinionem Hippocraticam firmat, et Ariſtotelicam refellit, ſemenque femineum in teſtibus [ovariis] deſiſitum per vaſa deferentia [tubis Fallopianis] in uterum deſcendere, ibique cum ſemine virili miſceri, et unâ embryonem formare aſſerit; utrumque denique ſemen pariter et aequè ad animal formandum conferre, et maffae compositae partes omnes, non tantum materiam, ſed etiam vim plasticam et δημιουργόν, maffam agitantem continere ſtatuit.

opusculo huic minus necessariis ; ovum feminis masculini animalculis jam impregnatum, et in uteri cavitate ponamus.

In uteri ergo cavitate, (femini masculino, et lymphae arteriolarum exhalantium immersum) corpusculum, vel bullulam exiguam innatantem fingimus. Fluidum hocce, cui ovulum immergitur, a vasculis per omnem ovuli superficiem patentibus, absorptum est : liquores isti sic absorpti, ab hisce vasculis ulterius praeparantur, altius elaborantur, et aptiores nutritioni embryonis inclusi efficiuntur : ita sensim crescit ovum, et vascula quibus ovario, vel calyci, seu corpori luteo nuper adhaeserat, evoluta ac ampliora deveniunt. Nobis etiam haud absimile videtur, vascula ista (quae scil. calyci nuper adhaeserant) principia placentulae constituere, quocunque in puncto membranam internam uteri primo contigerint : quae tunc temporis *faciem (f) villosam* induit. Pori membranarum ovuli assidue dilatantur, et plus nutrimenti quotidie absorbent : tandemque ovum cavitatem uterinam

(f) RUYSCH. Thesaur. anatom. vi. No 5.

uterinam penitus implet, eiusque parietem univcrsum contingit: ovo jam liquoribus turgido, pori ex ejus superficie protruduntur, adeo ut villi, tantum non infiniti, vel vascula admodum tenella fiant; quae se infinuunt in poros uterinos; sic utero materno adhaerescens, fixum et aptum ad nutritionem ulteriorem accipiendam devenit ovum. Dum autem villi hi venosi absorbentes succos uterinos hauriunt, et in ovum deferunt, vascula arteriosa exhalantia, poris uterinis, quibus inferuntur, fluida sua infundunt. Quae villosa ovi facies, ejusque ad uteri cavitatem adhaesio, multis (g) observationibus confirmatur. Vascula porro, quibus chorion utero adhaerescit, minutissima sunt, facillimeque sine sanguine effuso separanda; nisi qua parte placenta chorion obvoluta utero affigitur; de quo postea.

Quo recentius est ovum, eo latior est placenta; et dum utero in prima origine adhaerescere incipit, tota (h) ferè placenta videtur; praeter partem membranofam uteri plerumque cervici imminentem.

Quamvis

(g) RUYSCH.

(h) Ibid.

Quamvis (i) medici fundum uteri statuunt, cui semper placenta adhaerescat; multis tamen observationibus, nulli certae uteri parti, sed etsi saepius fundo, interdum tamen parieti anteriori vel posteriori, interdum lateribus, ipsique etiam cervici adhaesionem istam assignare cogor. In quibusdam feminis, tam arctè placenta utero adhaeret, ut obstetrici aut medico plurimum negotii facessat; in aliis autem, adeo lubricis tenetur vinculis, ut levissimo aliquo casu separetur, et inde haemorrhagia et abortus sequantur. Haec autem adhaesio, five major, five minor, tanta tamen est, ut per vascula, quibus haec adhaesio constituitur, satis alimenti foetui nutriendo et augendo a matre suppeditetur.

Foetûs nutritio, liquori amnii per os in ventriculum accepto, aut rubri sanguinis inter matrem et placentam, per veram anastomosis, circulationi assignatur. Hae autem hypotheses, a clarissimo (k) MONRO plenè refelluntur; qui simul luculenter ostendit, foetûs nutritionem praestari liquorum rubro sanguine tenuiorum absorptione, ab utero per

E

vasa

(i) DEVENT. Ars obstetricand. cap. 9—128.

(k) Medical Essays, vol. 2.

vafa placentae capillaria acceptorum, et foetui per venam umbilicalem transmissorum : — dum liquores tenuitatis similis, per arterias umbilicales, in uterum remittuntur, in capillaria terminantes, minuta magis, quam ut fluidum aliquod tinctum injectione infusum, transmittant.

Ita sensim distendi videtur uterus. Primo menstruae post conceptum periodi reditu, ovum satis utero adhaerescere ponamus. Sanguis periodo sua per emissaria in uterum rediens, nec paratum, ut antea in ejus cavitatem transitum inveniens, propter placentae ad excretoriorum orificia adhaesionem, haec emissaria distendit. Haecenus lymphae, aut subtilioris fluidi, a venis placentariis absorpti copia admodum parva est, sanguisque per hypogastrica ad uterum fluere pergit; et quoniam uteri parietes sunt prorsus ferè vasculosi, totius ejus substantiae incrementum necessario sequetur : idque, si nulla intus causa esset quae distenderet, latera tantum crassiora redderet, et simul cavitatem minueret; ovum autem, assidue cavitatem augens, omnemque fundi uterini partem complens, quoquo-

quoquoeversum uteri latera distendit, vi, sanguini exterius parietes uterinos distendenti ferè aequali, eâdem laterum crassitudine manente : ubi contrà, si nullus solito major sanguis in vasa uterina immissus fuisset, ovi incrementum et distensio, procul dubio, parietes uteri tenuiores reddidissent : et nisi ovi crescentis et sanguinis vasa uterina distendentis, vires aequales essent ; uteri parietes, secundum vim praepollentem, aut tenuiores, aut crassiores essent. Atque inde oritur differentia inter uterum, aliasque corporis partes cavas, quarum latera ab interna et subitanea distensione tenuiora, a diuturna autem crassiora evadunt. Unde, quamvis uteri cavitas tantum augeatur, ejus tamen parietes, neque secundum (l) quosdam, veluti vesicae distensae tenuiores ; neque secundum (m) alios crassiores factos ; sed ejusdem ferè, cuius uterus est non-gravidus, crassitiei esse cernimus. Plerique tamen uteri gravidum, quos nobis intueri contigit, tenuiores paulo, praecipuè

(l) MAURICEAU Traité des maladies des femmes grosses, chapit. iv. de la matrice.

(m) TH. BARTHOLIN, &c.

cipue circa parturiendi tempus, quàm aliàs inventi sunt : quod eo forsan tempore foetus vim praepollentem acquisierit.

Ubi ovum penitus adhaesit utero, sanguis redundans transitu in cavitatem jam obstructo, non ulterius evacuari potest, quam quoad in forma lymphae ad foetum nutriendum absorbetur : quod cum primò minimum sit, eadem, quae in obstructis mensibus symptomata oriuntur : atque hinc molestiarum series primis post conceptum mensibus provenit. Quando autem foetus majorem nutrimenti copiam desiderat, ita ut omnem qui evacuari per menstrua solet, sanguinem exhauriat, haec symptomata definunt.

Jam considerandum obvenit, quibus certis graviditatis temporibus uteri haemorrhagia maximè accidere possit, et quibus maximè periculosa sit. Si ovum non ita pridem post menstrua conceptum, ante, vel brevi post adhaesionem, utero excidat, quod saepius fit, quia vasa, vel parum, vel nil adhuc ultra modum naturalem distenduntur, nulla, vel saltem minima haemorrhagia sequitur.

Si

Si autem, ubi vasa placentaria humorum copiam aliquam magnam vix haurire possunt, sanguis periodo menstrua rediens, vehementior placentae superficiem impulerit, nullo dato transitu, interdum eam, simul cum ovo protrudit, et haemorrhagia sequitur; raro quidem periculosa, quoniam vasa nondum admodum dilatantur: sed in naturali graviditatis progressionem, ut uterus magnitudine augetur, ita vasa uterina quotidie dilatantur: unde constat, vitae matris periculum pro ratione temporis, quo uterum gestaverit, augeri.

Feminae hujusmodi haemorrhagiis secundo, tertio, aut quarto mense maxime obnoxiae sunt. In primis mensibus, haemorrhagiae non ita periculosae sunt: prognosis tamen admodum incerta: quamvis enim medici peritiâ haemorrhagia coërceatur, mulier tamen, per totum graviditatis tempus ejus re-ditu tentatur; adeo ut Medici, in arte obstetricatoria peritissimi, sententia fuerit, discipulis suis saepius inculcata, matri melius esse, fluorem huncce illico ovum expellere, quam coërceri: toties enim ingenti ferme cum periculo recursurum. Imo in tertio etiam mense,

se, haemorrhagiam tam vehementem, dolores tam violentes, et deliquia tam crebra comperi, ut persuasum fuerit, nihil aegrae vitam praeter ovi exclusionem fervare potuisse.

Si igitur femina uterum gerente, in uteri vagina sanguis appareat, medico cavendum est. Menstrua enim quamvis rarius, interdum tamen per totum fere graviditatis tempus, periodice fluere pergunt: ita autem distinguendum est; si menstrua sint, fluxus solitis periodis erumpit, minore potius copia quam ante conceptum, et pro ratione crescentis ovi minuitur; graviditatis molestias potius sublevabit quam augebit; sanguine a vaginae excretoriis solum manante, os uteri internum firmiter conglutinatum invenietur. Si vero menstrua non sint, sanguis ex ipso utero profluet, et os internum laxatum aliquantum si non apertum invenietur; fluxus diutius et majore copia quam in mensibus manabit; aut post parvum intervallum, ex levi aliquo motu, vel liquorum calidorum potu, redibit; et aegra imbecilla et languida deveniet: primò, horripilationes et rigores subiti, lassitudo gravis, nausea, anxietas, anhelatio,

latio, cordis palpitatio saepe accedent; dein lumbago, pubis dolor, et spasmoda in regione uteri, inter mulieres nostrates nomine (*bearing down*) notissima, sequuntur. Si haec, aut horum praecipua appareant symptomata, fluxorem istum, sine aut foetûs, aut matris, aut utriusque periculo, durare non posse, meritò statuendum est.

Interdum autem, paucae sanguinis guttulae tantum excernuntur, desinunt, et brevi iterum redeunt; atque ita per hebdomadas aut etiam menses, quamquam haud periodice procedunt:— aliàs, fluor profusus dolores comitatur, et ovum statim expellitur; aut ad deliquium usque perdurat, brevique tum desinit, rursusque viribus aegrae paululum restitutis, torrens denuo effunditur, donec tandem aegra, nisi ovi exclusione sublevetur, pereat. Nam, etiamsi os internum uteri hoc in casu, semper relaxetur, interdum tamen, sine vi incredibili non satis dilatari potest, ut exitus ovo patefiat.

Causae praedisponentes hujusmodi sunt: habitus plethoricus, mollis, laxus et succulentus:—

lentus :— diathesis tenella et delicatula ; nervique mobiles et facile irritabiles :— quod antea agrae menstruorum fluxu immodico aut fluore albo fuerit afflicta :— et praecipuè quod antea abortum passa.

Quoniam uteri emissaria, quorum orificia contactione placentae occluduntur, simul cum ipso utero dilatantur; quamvis nulla sit vasorum sanguinem rubrum continentium inter uterum et placentam anastomosis, immensum tamen sanguinis profluvium (*flooding*) ex placentae, in posterioribus mensibus, ab utero separatione, insequi manifestum est: ideoque, casum, saltum, tussim vehementem, sternutationem, paroxysmos hystericos, coitum, quicquid denique sanguinis momentum subito et valide auget, aut adeo ovum concutit, ut placentam ab utero separet, illico hanc haemorrhagiam efficere: alia tamen haemorrhagiae causa hîc speciatim tractanda.

Saepe evenit, ut post solita et regularia graviditatis signa, quartam circa mensem, dolores, ut in puerperio, unà cum haemorrhagia

gia feminam invadant, donec carneam quandam massam, quam scriptores obstetricatorii alii germen falsum, alii molam appellant, tandem pepererit. Ejusmodi verò molae, quamvis inter diffecandum nihil aliud quam massa deformis carnea, aut fibrosa appareat, plerumque tamen verae conceptiones fuisse videntur : homunciolus enim tenellus sexcentis modis ita evanescere aut quasi annihilari potuit, ut oculum acutissimum vel nudum vel armatum falleret ; adeo arctè haecce massa, ex placenta et membranis, vi uterina compacta est, ut nullo modo partes singulae discerni possint.

(*n*) Placentulae in utero diu retentae, mirum in modum formam naturalem mutant ; nunc hydatidum, nunc vesicularum pendentium humore aquoso refertarum speciem induunt. Ipse etiam sanguis coagulatus, in utero retentus, saepe ita comprimitur, ut densus, solidus, compactus sit, et in membranosam formam degeneret : (*o*) atque adeo ute-

F

ri

(*n*) RUYSCH. o' f. xxviii.

(*o*) KERCKRING. obs. xxxviii.

ri conſtrictione maſſa coagulata formam accipiat, quam molam appellant, quamque mulierculae vanae variis animalibus, ranis, talpis muribus, &c. aſſimulant, eaque viva opinantes territae fugiunt.

Ubi (*p*) ſanguis in aliquo emiſſariorum uteri ſtagnat, ſaepe in polypum quodammodo concreſcit, et ubi a ſuperveniente ſanguine vaſa ulterius dilatante, in uteri cavitatem propellitur ; haemorrhagia maximè periculofa ſaepe ſequitur : et huiusmodi concretio a pravo adſtringentium, ad immodicum lochiorum menſiumve fluxum coercendum, uſu effici poteſt. Si jam, hoc ſanguine concreto in emiſſariis manente, femina rurus concipiat, excretoria uterina ab ovi contactu occludentur ; inde proxima periodo menſtrua, viſ ſanguinis redeuntis, in priorem ſanguinem in emiſſariis concretum, impingit, et ab emiſſariis in uteri cavitatem exigit, tenellamque ovi adhaefionem abrumpit, unde haemorrhagia violenta neceſſario ſequitur : uteri enim excretoria, per quae maſſae coagulatae tranſierunt, nunc tantum

(*p*) HOFFM.

tum dilatantur, ut sanguini influenti resistere nequeant; vasorum latera longa distentione tonum amiserunt; uterus ipse, ab ovo et sanguine in uteri cavitate concreto, impeditur quominus emissaria contrahat. Os internum satis relaxatur ut sanguinem fluidum transmittat; nec fluxus desinet, donec os eo usque dilatetur, ut simul et ovo viam patefaciat: tum quidem, nisi admodum mulier debilitetur, uterus statim se contrahere, vasorumque orificia sensim occludi, et haemorrhagia sisti incipiet.

Ubi ovum, foetu extincto, aut sanguinis coagulum, in utero restat, horum magnitudo, menstrui sanguinis cumulo adhaerescente et circum concrecente, ita augeri potest, ut femina se in graviditate pergere credat, donec tandem, gravissimis doloribus, ut in vero partu, cum multo sanguinis profluvio enixa, massam protulerit.

Ex veteribus quidam, iique praestantissimi, feminas in molis gignendis, naturali modo concepisse, opinati sunt; ex imbecillitate vero, vel vis plasticae, vel ex defectu ductilitatis, vel

vel puritatis materiae, rudam nec informatam carnis massam productam fuisse. Alii, eas ex femine femineo unà cum sanguine menstruo sine feminis masculini auxilio, generatas fuisse existimarunt. Quacunque autem de causa, molae istae nascantur, haemorrhagiae, quae eas consequuntur, vulgo, multo quam fluor uterinus, in ullo verae graviditatis tempore, difficiliiores sunt: toties enim hîc, haemorrhagia cum anxietate, dolore, et debilitate intolerabili redit, ut aegra ultimum vitae periculum adeat, dum adhuc, os internum, summo obstetricis aut medici molimine ita dilitari nequit, ut massam transmittat.

Primis post conceptum mensibus, ubi causae praedisponentes existere comperiuntur, tempestivè ad methodum prophylacticum confugiendum est. Modica e brachio sanguinis missio, circa solitum menstruae periodi tempus, secundo, tertio et quarto mense, aut etiam diutius si postulent symptomata, plerumque ex voto succedit; et meritò quidem: inde enim facilis fit ab utero revulsio;—sanguinis arteriosi in hypogastrica impetus minuitur;—vasa uteri turgida ita evacuantur, ut elasticita-

tem

tem naturalem aut fervent aut recuperent ;— et ex circulatione aequabili placidaque, ovum tenellum nullum periculum sentiet ; ne sanguinis impetu, sese inter superficiem suam, et uteri parietes insinuantis, divellatur. Quare, hac sanguinis missione, medicus fluxum menstruum naturalem imitatur, et, secundum HIPPOCRATEM, magnum medicorum patrem, naturae minister prodit.

Hac methodo prophylactica, vel omissa, vel serius, vel frustra peractâ, si vera ab utero fiat haemorrhagia, et aegrae causas praedisponentes non ostendat, aut procatarecticae sint modicae haemorrhagiae levis, et symptomata lenia, tum ut haemorrhagiae coërcendae spes sit, ad cautiones generales jam dictas recurrendum : at, nitrosa non adhibenda, ne nauseam et vomitum creent, quae summa ope cavenda, ne sanguinis impetus a violente diaphragmatis, musculorum abdominalium et viscerum actione, in vasa uterina violentior sit. Quies tempestivo anodynorum usu quam maxime procuranda ; inter quae laudanum liquidum cum spiritu vitrioli acido vomitum etiam arcent ; et diluta, unâ cum chylo sanguini

guini citius immiscentur, quam opium solidum, quod ex ventriculi tantum contactu systema nervosum afficere a (q) nonnullis creditur.

Hisce remediis haemorrhagiâ coërcita, ni redeat cavendum: regimine refrigerante et diaeta subastringente, adhibitis etiam rosarum acidulata et antiphthysica tincturis, per idonea intervalla sumptis. Omni simul corporis animique agitatione quam maxime devitata.

Ut cautè sanguinis in vasa uterina impetus minuendus, sic æquabilis et debita ejus circulatio conservanda est: nam, si ex nimia sanguinis jactura, in matre circulatio languidior aut interruptior fit, ovulum languere et inaniri oportet: quod vascula illa minuta, quibus utero connectitur, statim collabuntur, simulac lymphæ distendente privantur. Hoc enim in universo corporis systemate (quod ab origine totum est vasculosum) compertum est, si canales minuti liquidis influentibus priventur,

(q) WEPFERUS *Histor. cicutæ aquaticæ*.
Med. Essays, vol. v. *Dissertation on opium* by Dr. ALSTON.

tur, statim collabi, et concrefcere: imo, non folum vafa vaforum in fene, adultò, et juvene evanefcere, fed in infante etiam, vafa ampla umbilicalia, canalis venofus et arteriofus liquoribus influentibus privata, confolidari conftat.

Ubi autem in ultimis graviditatis menfibus haemorrhagia erumpit:—fi caufae violentiores praecefferint:—fi cautiones et medicamenta fruftra fuerint adhibita:—et fimul fymptomata graviffima comitentur: — tum quidem, Celeberrimi BOERHAAVII effatum veriffimum experiemur: *Inter periculofiffimos gravidarum morbos habetur fluor uterini fanguinis.* Nec aliud quid aegrae ad vitam confervandam proderit, quam prompta et perita obftetricis aut medici munus, quâ foetus et placenta quam citiffime eripiantur. Quoniam autem hujufce rei exfequendae modus ad chirurgum propriè pertinet, in hoc tentamen intrudere non aufim: praefertim quum ejus ratio et neceffitas nobis propriè, fpectanda, jam antea tractata fint. Frufta enim, et cum aegrae pernecie, artibus pharmaceuticis, hoc in ftatu, uterini fanguinis fluorem coërcere conabimur.

Trifte

Triste quidem ! eo autem tristius est ! quod non rarius eveniat, aegram sub ipsis medici peritissimi licet et dextimi manibus interiri ; et nisi tempestivè advocetur, quamvis ejus ope onus molestum deposuerit, post tamen aliquot dies, languidam et exhaustam vitam morte mutare : cujusmodi casum unicum, tristissimum quidem quod mihi in praxi contigerit, hic liceat referre.

Matrona quaedam, proceritate mediocri, habitu corporis gracilior, valetudine autem praestans, et in re domestica agilior, quatuor liberos florentes enixa, tricesimum annum, excefferat ; quando, jam sex menses gravida, ab omni haemorrhagiae hujus, quae apparebat, causa praedisponenti immunis, ab initio mensis septimi, crebra sanguinis ab uteri vagina stillicidia sensit, quae cum dolore aliquo sensim augebantur, ut post dies circa quinque et triginta a morbi initio, medicum insignem arcesceret ; qui, Februarii septimo, 1749, sanguine modicè misso, medicamentis anodynis, pulvere styptico cum rhabarbaro, et non-naturalium regimine, adeo fluxum coërcuit, ut spes fuerit aegram, si modò
cautè

cautè se gessisset, tutò ad tempestivum partum perrecturam: multum verò levata, temere circa domestica, pro more, agilis coepit occupari; unde, circa finem mensis (vigesimo tertio scil. die) haemorrhagia adeo violenta sequuta est, ut necessarii omnes de salute desperarent. Medici prioris, valetudinis causa, absentia, operam meam advocabat: die quinto et vigesimo arcessitus, in lecto stratum inveni,— instar cadaveris pallidam,— maximè debilitatam et exhaustam,— doloribus nullis, aut quam minimis, laborantem,— vaginam sanguine coagulato plenam,— os uteri laxum et aliquantulum dilatatum,— cruoris quoque coagulum ad libras duas, quod paulo ante effuderat, in vase asservatum.

Primo intuitu patebat, aegram hancce praesens vitae periculum subituram, nisi protinus onere levaretur; et ne in ipsa operatione interiret, maximè erat metuendum: eoque magis, quod placenta ipsa, membranis integris, ore uteri interno obducta, eique firmiter adhaerens, primò digitis se objiciebat. Tempore quam minimo, sine ullo ferè aegrae

G

dolore,

dolore vel nixu, aut sanguinis impendio, quum foetum eripuissẽm ; aegrẽ admodum, digitis pedetentim promotis, placentam utero adhaerentem, dimovi. Foetus ex tactu flaccido, colore subfusco, epidermide levissima attritione amolita, jamdudum mortuus fuisse videbatur. Dolores post partum, solito paulo minores erant,— lochia regulariter et copiã idonea fluebant. Per totum denique tempus pomeridianum, puerpera, praeterquam quod mirum in modum erat debilitata, optimam de se spem faciebat. Analepticis crebrò, et pro ventriculi modo, sumptis, sustentabatur. Cortex Peruvianus, idoneis intervallis, et prout capere potuit, administratus est. Die autem proximo, horripulationes vagae, rigores, tremores, singultus, et delirium denique invasit, ut vigesimo octavo, post meridiem, curã omni frustra adhibita, exspiraverit.

Atque in hoc casu, ex difficultate, quam diximus, placentae, a cervice uteri dimovendae, constare videtur, singularem haemorrhagiae hujus causam fuisse ; quoniam propter placentae situm, ex ore uteri sensim dilatato,

dilatato, haemorrhagia necessario erumpebat: quum cellulae, earumque emissaria, si non sola, at certè semper plura sint, et refertiora in ea parte uteri, cuicunque placenta adhaerescat.

Haemorrhagia quae post partum fit, jam tandem sequitur tractanda; quam, ut plenius intelligamus, mutationem quam uterus ex graviditate patitur, reputemus; incredibilem scil. vasorum dilatationem, et orificiorum se in ejus cavitatem aperientium incrementum: quae, dum placenta iis adhaerebat, quominus sanguinem aliquem effunderent impediabantur; eâ vero divulsa, patefcunt emissariorum ora, et illico sanguineus proruit torrens, donec vasa uterina turgescere desinant; ita pressurâ laterali remota, vi elastica naturali contrahuntur, et sensim priora sua lumina recuperant: fibrae simul utero musculares, causâ distendente remota, nunc agere incipiunt, uterumque ad pristinam modum reducunt; unde sanguis in uteri cavitatem influens raturatur; et minore copia fluit, donec tandem, utero ad pristinum statum prorsus redactò, sanguinis cursus per hypogastrica transire solitus

litus, vasorum uterinorum resistentiâ coactus, aliò deflestat. I orro, vasis majoribus evacuatis, venae minores quibus sanguis ab arteriis redit, minus premuntur; unde viâ solita circulatio procedit. Tempus quo haec peraguntur, pro varia in feminis diathesi, sanguinis copia, vasorum elasticitate, aetate, climate, et tractandi modo varium est.

Hic humorum fluxus naturalis lochia dicuntur. Primo, diffluit sanguis ruber: brevi instar carniū loturae pallidior; et in diem secundum, tertium, quartum et quintum, vulgo, serofus aut lymphaticus, coloris albicantis aut subviridis; atque ita per dies plus minus viginti minui pergit. Et, ut in menibus, sic in lochiis, ex symptomatibus potius quam copia dijudicandum est. Copia, et durationis tempus, prorsus incerta sunt; nec enim, quamvis citius solito desinat fluxus, inde morbidam suppressionem esse statuendum est, modò mulier nulla iniqua habeat symptomata, et pro more revalescat: nec fluxus immodicus judicandus est, nec ullo ratione coercendus, modo aegra facile ferat (a). Lochialis

(a) ἸΠΠΟΚ. ἀφορισμ. κέ Τμημ. α.

Ἦν ὅτι δὲ καὶ θάλλεσθαι καὶ θάλλουσαι, συμφέρει τε,
καὶ εὐφίως φέρουσι τὰ δ' ἐναντία δυσχερῶς.

chialis enim fluxûs (b) per sex hebdomas durantis alia, alia autem biduo desinentis, nullo cum aegrae incommodo, exempla sunt. In quibusdam, diarrhoea, in aliis, larga lactis a mammis secretio lochia terminat.

Fluxus lochialis vulgo diutior in iis est, quibus diutior fuerat menstruus, et contra: et quidem, prout status fibrarum laxior aut rigidior: unde patet, quantum ex musculari uteri compage ejusque vasorum contractione pendeat.

Si lochia ullo modo intempestive coërceantur, symptomata plurima et gravissima cito sequuntur: in utero dolor et inflammatio; cephalalgia, nausea, dyspnea, inquietudo, anxietas summa, pessimae febres, mors; nisi puerpera evacuatione aliqua critica, aut lochiorum reditu sublevetur: sed haec obiter observasse satis est.

Si autem lochiorum fluxus adeo immodicus sit, ut debilitatem, pallorem, pulsum exillem, debilem et intermittentem, syncopen et convulsionem adducat, tum ad remedia in immenso

(b) LA MOTTE.

menſo ſanguinis profluvio jam recensita recurrendum. Lochiorum autem fluxus raro ita violentus eſt, ut ſubitum et imminens periculum minetur ; modò analeptica, eupepta, cardiaca lenia, et ſubaſtringentia medicamenta adhibeantur. Ad fibras et vaſorum uterinarum tonum reſtituendum, tinctura roſarum rubrarum cum ſpiritu vitrioli efficaciffima ſunt.

Si haemorrhagia placentae ab utero ſeparationem conſequens, vehementior ſit, ut ſymptomata graviora adferat, aegra in ſummo erit periculo, quamvis brevi tantum duraverit. Symptomata autem ſunt, debilitas maxima, pallor, pulſus debilis et exilis, anhelatio, ſuſpiria, deliquia crebra, anxietas ſumma, extremitatum frigiditas, convulſiones etiam et mors, niſi cito haemorrhagia coërceatur.

Fibrae debiles et laxae, et ſanguis nimis attenuatus, hujus haemorrhagiae cauſae prediſponentes cenſeri poſſunt.

Quantumvis autem, ſolidorum ſtatus, et ſanguinis craſis bene ſe habeant, ſi tamen
foetus

foetus alter, sanguis coagulatus, placenta, aut placentae frustula ; quicquid denique uteri contractionem impedire potest, si in eo relinquatur, necessario haemorrhagiam hancce continuabit. Nec quid aliud aegrae certum auxilium adferet, nisi id, quod in utero est, evacuetur ; quod si fiat, modo aegra bona sit diathesi nec nimis debilitata, ipse se contrahet uterus, et sine ullis medicamentis haemorrhagiam satis coërcebit : sin minus remediis supra memoratis aegrae succurrendum. Quomodum vero haemorrhagiae hujus causae interdum negligi, aut male dijudicari possint, casu quodam, quem jam memorabo, patebit.

Anno 1751, Generosa, tres et viginti annos nata, in primo puerperio, ab obstetrice, quae peritiam suam ad medicorum invidiam jactabat, onere levata fuit. In parturiendo nihil difficile aut insolitum sese obtulit ; vivebat et valebat proles ; mulier, secundum praeconium obstetricatorium, *tuta, munda* ad lectum deducta est : et obstetrix, ut operam suam mulierculis assidentibus venditaret, iis quo ignariùs eo effusiùs omnia laudantibus, *secundinas*

dinas integerrimas gloriosius monstrabat.

Cum vero puerpera crebriorem et diuturniorem sanguinis fluxum sentiret, amicae jam anxiae, chirurgum in hac re versatissimum arcessendum curarunt: qui vasorum uterino um laxitatem causam esse opinatus, quae visa sunt consentanea, adhibuit, aegramque aliquandiu levavit. Haemorrhagia autem duas aut tres post hebdomadas, violentius rediit, et rursus anodynis coërcita desit: ab hinc circiter mensem, non revalescente aegrâ, medicum insignem consulere visum est: qui, cum pannos crassiores, horis perpaucis, humore olido et sanioso penitus malefactos;— aegram, facie instar cadaveris pallidâ, macie confectam,— pulsumque exilem et concitatum observaret; obstetricis, ejusque sociarum, asseverationibus minus fretus, puerperam non ritè liberatâ censuit, et chirurgum obstetricatorium rursus statim arcessi iussit: quum inter eos uterum explorari convenisset, placentae frustum, crassum, firmum, compactum, aegrè admodum sexagesimo primo post partum die, utero extractum est; et mulier brevi pristinam sanitatem recuperavit.

Si haemorrhagia ab imbecillitate fibrarum uterinarum oriatur, quâ emissaria hiantia manent, aut saltem non adeo contrahuntur, quin rubri sanguinis fluxum pergere permittant; periculum (*a*) imminens, lentam medicamentorum internorum efficaciam in hoc casu expectare vetat, et ad validissimam externorum opem confugere suadet, internorum simul auxilio adhibito; utraque autem talia sint, ut fibris uterinis elatera restituant; simulque, modo aegra ferat, sanguine e brachio missio, sanguinis ab utero fiat revulsio. Fetus astringentes cum alumine soluto &c. pudendis admovendi. Injectiones in uterum immittendae, tam ad excretoriorum ora, quam ipsum universum uterum contrahendum: decoctum rosarum rubrarum cum balauistiis in vino rubro laudat HOFFMANNUS: qui etiam tradit, linteum (*b*) contortum, et astringenti imbutum, in sinum uteri quousque penetrare potuit intrusum, ad hujusmodi haemorrhagiam coercendam efficacissimum fuisse, aegramque brevi convaluisset. Lumbis quoque tepida

(*a*) HEIST. Institut. Chirurg. p. 1070. et passim apud alios.

(*b*) Tom. ii. p. 228.

pida astringentia applicanda. Abdomen sudario aut fascia comprimendum, tantum saltem, quanta fuerat ab utero gravido, vasorum abdominalium compressio: qua re, minus sanguinis per aortam descendentem defluet, nec fluor recens copiosior ad haemorrhagiam continuandam hypogastricis suppeditabitur, et aorta superior copiam majorem, in omnibus ramis suis habebit; unde non tantum revulsio ab utero sine majore sanguinis impendio efficitur, sed cerebro etiam ritè suppleto, ad deliquia cavenda spiritus refocillantur: pressura etiam, ad ipsa vasa uterina comprimenda prodesse potest, ut, fasciâ simili adhibita lochia coerceri, eâ autem amota, rediisse (c) traduntur. Nec inutiles erunt ligaturae brachiis et femoribus circumductae ad sanguinis circuitum tardandum, modo ne tantae sint ut sanguinis reditus in cor prorsus impediatur.

Interea, aegra analepticiis reficienda, et cardiacis iis, non quae stimulo suo subito calefaciunt et sanguinis motum accelerant, ut ex officina pleraque; sed quae fibras corroborant, corpusque nutriunt: qualia sunt jura
carnium

(c) LA MOTTE Observ. ccccx.

carnium, aliaque jam dicta, quae non tam statim spiritus incitant, quam sanguini cito immista, vasa exhausta implent, et circulationem languidam sustinent: neque adstringentia omittenda, quibus fibrae imbecillae et relaxatae corroborarentur; opiata quoque hîc maxime necessaria, ad *somnum* aegrae conciliandum, vel maximum virium exhaustarum *refectorem*, fluxu jam aliis remediis coercito.

Et haec quidem, de morbi hujus natura, causis et remediis, generaliora et praecipua dicenda habui, quoad per hujusce tentaminis mearumque virium modum licuit: singula autem percurrere, causarum omnem varietatem enumerare, remedia harum unicuique aptissima recensere, casus omnes solennes et insolentiores memorare, et singulis objicienda refellere, nec in animo est, nec si esset, in tanta celebritate, tantaque clarorum virorum auctoritate et verecundia, venditare auserim.

F I N I S.

